

前明訪查義門陳氏遺蹟照舊勒碑豎坊題額表揚實錄

九江府德化縣爲訪查遺蹟事嘉靖三十二年七月十一日蒙
本府抄江西巡按監察御史蕭 憲牌前事查得該府原有義
門陳氏卽今遺裔如何居處故宅有無尙存關係風化應合查
覈爲此仰府官吏照牌事理卽便轉行查明具報或應作何表
揚一併詣呈等因蒙此到縣就今牒委主簿歐陽潮親詣甘泉
鄉拘集里眾鄒邦等查訪得義門陳氏現有支派元孫陳濟冠
帶生員年七十七歲住居藍橋坂其餘同宗人丁散居本府各
處約百餘口宗譜明白其先世合族處所止存荒地併樹山一

所座落義門山先年置立急遞鋪亦名義門鋪後奉明文改路
興鋪等因就今行准本府儒學牒稱查得陳濟原係廩膳生員
奉例冠帶現住藍橋坂去義門十餘里舊址的住義門山下與
軍屯相混合無別轉速豎坊題額表揚其處庶使前賢遺蹟不
致湮沒等因隨送陳濟赴府稟稱先世故居原有祠堂屋宇因
兵燹蕩毀止有址下上基尙存今蒙作興感激願自建祠堂以承美
意等情蒙府勘得義門陳氏聚族江州其來已久家法之善萬
指同食感化所及百犬同牢歷朝不次旌表隱顯代有聞人里
閭共知其宗父老能言其處止緣世變播遷子孫稍微弱不振

盛事委于無聞遺基漸次失墜豎坊題額實于風化有裨候呈
詳到日行縣查支無礙銀兩將前義門遺址週圍築牆迴護前
造木柱瓦蓋樓一座虛中以聽陳濟等自立祠堂以紹先祀祠
前建立牌坊一座上乞 本院命題數字示下本府遵依鐫勒
其上用垂永久庶已墜之宗乘機復振行路改觀人心興起其
牆外餘地併山一座照今清出界址聽令陳濟等并同族人耕
住看守祠堂仍將山地廣濶數里畫圖連今查理緣由開列立
碑于圍牆之中待其祠成之日另行安置爲此今備前由併約
計合用工料銀兩數目另出揭帖一本轉呈伏乞照詳施行蒙

批依擬豎坊立門坊曰義門陳氏遺址門曰敦睦或匾有大小
該府不妨加減一二字可也餘依擬繳九江府爲訪查遺蹟事
嘉靖三十二年八月初二日准本府推官潘季馴自省城回稱
蒙 巡按江西監察御史蕭鈞示義門遺蹟當在德安縣等准
此案先蒙本院憲牌前事依行據德安縣申稱查訪義門志載
在府城西六十里與林嶺高梁山相接義門陳氏原居其下故
名義門山等因到府據此隨查陳氏子孫俱各散居據現在藍
橋坂陳濟齋送族譜到府審與里縣申相同近因祭祀 文廟
兩學生員供事咸在備加詢訪復據德化縣生員陳言陳盟執

伊先世祠堂及受旌處所在德安縣太平鄉常樂里今宗族散居各府不一其義門山義門鋪雖係舊址原坐德安德化瑞昌三縣交界止便藍橋一派餘派不便如賜表揚願于受旌處所以彰故蹟爲幸因進諸學而詢眾稱德化瑞昌德安等縣各稱陳姓俱係義門後裔自兵燹後各從他地先後徙回人各以義門陳氏相呼俱不係留存支派據此因見各說不的深懼上辜本院查訪至意具由稟請間適准本官詳稱前因復查德安縣志載義門遺蹟下註云在縣西北六十里大兵後四十九世孫伯宣隱居廬山今江州太平宮後遷義門兵燹立鋪于其上故

名義門鋪唐時置莊籍於德安縣太平鄉常樂里自是宗族益盛旌表不次竊詳德安之東北卽府城之西南其志註云六十里顯今義門鋪係其始居之地彼時族屬已眾行誼已聞故山與鋪俱以得名其徙居德安人益繁熾聲名人物攸出累代表彰其地益重係在德安之東南距今義門鋪一百餘里不當驛路又無子孫生員在學祠之側典守無人遺之則湮沒可慨乞容本府行令該縣將陳氏原日有何現在遺蹟逐一查出立碑表識以垂久遠如就始居之地表揚則道經絡繹子姓咸在仍舊只照前議圍牆豎坊聽陳濟等族人自建祠堂以承宗祀於

議亦通爲此今備前由連呈伏乞照詳施行蒙 批義門旣係
始居之地又山與舖俱以此名想其當時同居行誼亦已著矣
其地亦應表揚仍照前批豎坊立門該府再行德安縣查於常
樂里遺址別加表識繳

嘉靖三十二年十月二十日

巡按江西監察御史蕭端 九江府知府鍾卿 同知羅朝
陽 通判杜學詩 推官潘季馴 德化縣知縣蔣尙卿
主簿歐陽潮 典史金岳